



Nando pitôr al veve nomine e snait di savê ben messedâ pinel e colôr.

Un dì un plevan di un paîs da la basse lu clame a pitâ un crist su la crôs, e par davuelzi chê vore oltri il dovût onorari i da lozament fintremai a lavôr finît.

Il contrat al fo fat e Nando al scomence il lavôr dopo vê garantît cun tendis e linzûi a scuindi il mûr de glesie, che nissun al veve di viodi.

Nando al piturave, ma no cun trop gust; no pal lavôr, ma pe monotonie dal past, fertaie cu le cevole a gulizion, fertaie cu le cevole a misdî, al replicave mirinde e la cene e tornave cussì. A corevin i agns dibot subit vuere, e la perpetue si scusave, che di altri nol jere, cussì Nando, pazient, al mangjave chel pôc passât dal convent.

Finalmentri il lavôr al ven concludût e domenie in gran fieste al sarès stât presentât.

Sindic, fabricîrs, bande paesane, president di latarie, sunadôrs di cjampane... al rive il moment di scuvierzi il lavôr.

Al tîr di une cuarde al cole jù il covertôr, ducj i presints a mugugin, nissun bat lis mans...

Ce jerial sucedût?!

Il signôr al veve il cjâf pleât dut in bande, e plui che une espression di dolôr al pandeve muse di disgust e riviel, come stiçât di un cjatif odôr!

Il plevan dut scaturît al domande a Nando spiegazions...

“Siôr plevan”, al dîs Nando, “Fertaie e cevole a matine, fertaie e cevole a mieç dì, fertaie e cevole a cene, al è normâl che il respîr dal pitôr ai vevi dade che pene!”

di Luciano Marinig